

## ■ OR DA LA VITA DA LUDMILLA CAHENZLI

# Mes auto tutga mo a mai e mes chastis gist era

Jau, Ludmilla Cahenzli, sun in'emanza tras e tras. En il perchasa fatsch jau adina mo tant sco mes um. En l'educaziun dals uffants sun jau pli autoritara che mes um. E mes biro hai jau uschè gugent sco mes um la Côte d'Azur. Ma en in regard n'hai jau betg cuntanschi mias finamiras emancipatoricas ch'jau aveva sco giuvna, cura ch'jau legeva l'Emma dad Alice Schwarzer. En quest punct sun jau dependenta da mes um.

Jau discuro da l'auto. En sasez fissi mes auto. Jau dovr el mintga di, jau tanchesch el e na lav mai el. Gliez na disturba anc betg mes um Eugen Cahenzli, el ha gesa ses agen auto. In pli grond, in pli char ed in ch'el po lavar mintga sonda. Il problem è: mes auto era pli baud noss auto communabel ed el è anc adina registrà sin il num da mes um. Questa inconsequenza en mia biografia – tras e tras emancipatorica – chaschuna savens tensiuns en nossa lètg.

Eugen è in pulit schani. El cuschina bain, gudogna bain e na fa betg grondas caneras. Ma el ha sias flaivezzas. El rea-

gescha fitg sensibel, sch'i vegn en chasa brevs cun cedels verds u rosa. Cuzunt sch'ils quints vegnan da la polizia, è adressads ad el e chaschunads da mai, Ludmilla Cahenzli. Lura fa mes um – uschiglio in bunatsch – adina sfratgs.

En quest connex stoss jau forsà anc dir insatge davart mes stil dad ir cun auto. El è rassig, lessig, emancipatoric. Jau sun in tip che suonda sias finamiras cun in tschert schlantsch. Sch'jau hai per exempel dad ir a far cumissiuns, fatsch jau quai a moda dinamica per suenter pudair passentar bler temp en mes biro ed avair là mes ruaus. E sch'jau vom cun auto a far cumissiuns, scriv jau davant mes egl intern adina la glista da cumprar en.

Jau nod davant mes egl intern: jogurts da mocca, palpieri da tualetta, brekkies per ils giats. La glista cuntegna per il solit passa ventg chaussas ed jau stoss pia ma concentrar enorm per tegnair endament tut. Perquai n'èsi simplamain betg pussaivel d'anc far stim da mintga tavla a l'ur da la via.

Mes um n'ha insumma nagina chapientscha per las glistas davant mes egl intern. Mintga giada ch'i vegn puspè in chasti da la polizia fa el sco sch'il mund giess sutsura. «Puspè in chasti! Sas tge che quai custa! E puspè davant il migros! Gia la sisavla giada! Betg da crair! Ti sas doch exact ch'i ha là in blitz.»

Suenter tals intermezzos fatsch jau adina il propièst da ma liberar or da la dependenza da mes um e da registrar mes auto sin mes agen num. Gist tenor il princip emancipatoric: mes auto tutga mo a mai! E mes chastis gist era! Ma lura emblid jau puspè da midar la registraziun. Fin ch'i chamegia la proxima giada dad ir en il migros. Gliez hai fatg avant paucs dis. Jau sun ida smaladet spert. La brev da la polizia n'è anc betg arrivada. Tgi sa, forsà prendan els ussa davent ad Eugen la lubientscha da charrar.

**Il cudesch pon ins retrair online tar Lia Rumantscha [www.liarumantscha.ch](http://www.liarumantscha.ch) ([http://www.liarumantscha.ch/sites/content/online\\_shop.html?shop:view=details&shop:productid=2830](http://www.liarumantscha.ch/sites/content/online_shop.html?shop:view=details&shop:productid=2830)) u tar mintga libreria**

